

МОНГОЛ УЛСЫН ИХ ХУРЛЫН ТОГТООЛ2025 оны ... дугаар
сарын ...-ний өдөр

Дугаар ...

Улаанбаатар
хот**"Төрийн өмчит хуулийн этгээдийн хувьцааг 2026-2028 онд биржээр олон нийтэд нээлттэй худалдах, төрийн өмчийг хувьчлах, өөрчлөн байгуулах үндсэн чиглэл батлах тухай"**

Монгол Улсын Их Хурлын тухай хуулийн 5 дугаар зүйлийн 5.1 дэх хэсэг, Төрийн болон орон нутгийн өмчийн тухай хуулийн 8 дугаар зүйлийн 1 дэх хэсгийн 5 дахь заалт, "Шинэ итгэл-Эрс шинэтгэл" "Монгол Улсыг 2026-2030 онд хөгжүүлэх таван жилийн үндсэн чиглэлийг тус тус үндэслэн Монгол Улсын Их Хурлаас ТОГТООХ нь:

1. Төрийн өмчит хуулийн этгээдийн хувьцааг 2026-2028 онд биржээр олон нийтэд нээлттэй худалдах, төрийн өмчийг хувьчлах, өөрчлөн байгуулах үндсэн чиглэлийг хавсралтаар баталсугай.

2. Улсын Их Хурлаас 2001-2022 онд баталсан төрийн өмчийг хувьчлах, өөрчлөн байгуулах болон төрийн өмчит хуулийн этгээдийн хувьцааг биржээр олон нийтэд нээлттэй худалдах үндсэн чиглэлүүдийн хэрэгжилтийг хангуулах чиглэлээр дараах арга хэмжээг хэрэгжүүлж, Улсын Их Хурлын 2026 оны хаврын ээлжит чуулганаар хэлэлцүүлэхийг Монгол Улсын Засгийн газар /Г.Занданшатар/-т даалгасугай:

2.1. төрийн нийтийн өмчид зайлшгүй байх хувьчилж үл болох хөрөнгө болон ашгийн бус, нийгмийн шинжтэй төрөөс үйл ажиллагааг заавал хариуцан явуулах шаардлагатай төрийн өмчит хуулийн этгээдийн төрөл, чиглэлийг тодорхойлж, холбогдох жагсаалтыг боловсруулж, шийдвэрлүүлэх;

2.2. Улсын Их Хурлаас 2001-2022 онд баталсан төрийн өмчийг хувьчлах, өөрчлөн байгуулах болон төрийн өмчит хуулийн этгээдийн хувьцааг биржээр олон нийтэд нээлттэй худалдах үндсэн чиглэлүүдийн хэрэгжилтэд нийгэм, эдийн засаг, санхүүгийн өнөөгийн бодит нөхцөлд бодитой үнэлэлт, дүгнэлт хийж, төрийн өмчийг хувьчлах, өөрчлөн байгуулах, төрийн өмчит хуулийн этгээдийн хувьцааг биржээр олон нийтэд нээлттэй худалдах талаар цаашид авах арга хэмжээний санал боловсруулж, шийдвэрлүүлэх.

3. "Төрийн өмчийг 2015-2016 онд хувьчлах, өөрчлөн байгуулах үндсэн чиглэл батлах тухай" Улсын Их Хурлын 2015 оны 07 дугаар сарын 03-ны өдрийн 70 дугаар тогтоолын хавсралтаар баталсан "Төрийн өмчийг 2015-2016 онд хувьчлах, өөрчлөн байгуулах үндсэн чиглэл"-ийн 4.1, 4.2, 4.4, 4.5, 4.7, 4.14, 4.17 дахь заалтыг тус тус хүчингүй болсонд тооцсугай.

Гарын үсэг

**ТӨРИЙН ӨМЧИТ ХУУЛИЙН ЭТГЭЭДИЙН ХУВЬЦААГ 2026-2028 ОНД
БИРЖЭЭР ОЛОН НИЙТЭД НЭЭЛТТЭЙ ХУДАЛДАХ, ТӨРИЙН ӨМЧИЙГ
ХУВЬЧЛАХ, ӨӨРЧЛӨН БАЙГУУЛАХ ҮНДСЭН ЧИГЛЭЛ****НЭГ.ҮНДСЭН ЧИГЛЭЛИЙН ЗОРИЛГО**

1.1. Төрийн өмчит хуулийн этгээдийн хувьцааг 2026-2028 онд биржээр олон нийтэд нээлттэй худалдах, төрийн өмчийг хувьчлах, өөрчлөн байгуулах үндсэн чиглэлийн зорилго нь төрийн өмчийг хувьчлах үйл ажиллагааг үе шаттай, үр дүнтэй зохион байгуулах, төрийн өмчит компанийн хувьцааг олон нийтэд нээлттэй хувьцаат компани болгох, нэмж хувьцаа гаргах замаар олон нийтийн хяналтад оруулж, засаглалыг сайжруулах, үр ашгийг нэмэгдүүлэх, санхүүгийн сахилга бат, ил тод байдлыг хангуулж Монгол Улсын эдийн засаг, нийгмийн тогтвортой хөгжлийг дэмжихэд оршино.

Монгол Улсын Засгийн газрын 2024-2028 оны үйл ажиллагааны хөтөлбөрийн 3.1.2.4-т “төрийн болон орон нутгийн өмчит компаниудын засаглал, ил тод байдлыг сайжруулж, олон улсын менежментийн багаар удирдуулж, нээлттэй хувьцаат компани болгон, үр ашиг, баялгийн тэгш хуваарилалтыг нэмэгдүүлнэ” гэж, 3.3.3.1-д Эрчим хүчний салбарын өсөлт, либералчлах, эрчим хүчний салбарыг чөлөөт зах зээлийн зарчимд шилжүүлж, үнэ тарифыг зохистой түвшинд хүргэн, цаашид тогтмол индексжүүлэх тогтолцоог нэвтрүүлж, салбарын эрх зүйн орчныг шинэчилнэ” гэж, 4.1.4.2-т “төрийн болон орон нутгийн өмчийн удирдлагын нэгдмэл байдлыг хангах, төрийн болон орон нутгийн өмчит аж ахуйн нэгжийг улс төрөөс хараат бус, нээлттэй, ил тод, зах зээлийн зарчмаар үйл ажиллагааг явуулах тогтолцоог бүрдүүлэх...” гэж, 4.4.10-т “Төрийн болон орон нутгийн өмчийн бүртгэл, ашиглалт, хамгаалалтыг сайжруулж, төрийн өмчит болон төрийн өмчийн оролцоотой хуулийн этгээдийн засаглалыг олон улсын жишигт нийцүүлэх, газрын хууль тогтоомжийг төрийн байгууламж нэгдмэл байх зарчим болон өмчийн эрх зүйд нийцүүлэн боловсронгуй болгоно” гэсэн зорилтыг тус тус дэвшүүлсэн.

“Засгийн газарт чиглэл өгөх тухай” Улсын Их Хурлын 2024 оны 12 дугаар сарын 12-ны өдрийн 52 дугаар тогтоолын 2 дахь заалтын 3 дахь дэд заалтад төрийн өмчийг хувьчлах үндсэн чиглэл, төрийн өмчит хуулийн этгээдийн хувьцааг биржээр олон нийтэд нээлттэй худалдах асуудлын талаар холбогдох санал боловсруулж, Монгол Улсын Их Хуралд өргөн мэдүүлэхийг Засгийн газарт даалгасан.

“Шинэ итгэл-Эрс шинэтгэл” “Монгол Улсыг 2026-2030 онд хөгжүүлэх таван жилийн үндсэн чиглэлд төрийн өмчит компанийн засаглалыг олон улсын компанийн засаглалын зарчимд нийцүүлэх, төрийн болон орон нутгийн өмчийн үр ашиг, хариуцлагыг нэмэгдүүлэх, Төрийн болон орон нутгийн өмчийн харилцааны бүртгэл, мэдээллийн ил тод байдлыг бүрэн ханган төрийн болон орон нутгийн өмчийн удирдлага, зохицуулалтын цахим шилжилтийг хийх зорилтыг тусгасан.

ХОЁР. ҮНДСЭН ЗАРЧИМ

2.1. Төрийн өмчийг хувьчлах, төрийн өмчит компанийн хувьцааг биржээр олон нийтэд нээлттэй худалдахад дараах үндсэн зарчмыг баримтална:

2.1.1. Төрийн өмчит компанийн хувьцааг олон нийтэд нээлттэй санал болгох, нэмж хувьцаа гаргах замаар олон нийтийн нээлттэй хувьцаат компани болгох, нэмж хувьцаа гаргах замаар олон нийтийн хяналтад оруулж, засаглалыг сайжруулах, үр ашгийг нэмэгдүүлэх, санхүүгийн сахилга бат, ил тод байдлыг хангуулах, төрийн өмчийг хувьчлах, өөрчлөн байгуулах, төрийн өмчит компанийн хувьцааг биржээр олон нийтэд нээлттэй худалдах арга хэмжээг хууль эрх зүйн хүрээнд ил тод, нээлттэй хэрэгжүүлэх;

2.1.2. Төрийн болон орон нутгийн өмчит компаниудын засаглал, ил тод байдлыг сайжруулж, олон улсын менежментийн багаар удирдуулж, нээлттэй хувьцаат компани болгон, үр ашиг, баялгийн тэгш хуваарилалтыг нэмэгдүүлэх;

2.1.3. Эрчим хүчний салбарын өсөлт, либералчлах, эрчим хүчний салбарыг чөлөөт зах зээлийн зарчимд шилжүүлж, үнэ тарифыг зохистой түвшинд хүргэн, цаашид тогтмол индексжүүлэх тогтолцоог нэвтрүүлж, салбарын эрх зүйн орчныг шинэчлэх;

2.1.4. Төрийн өмчит компанийн төрийн эзэмшлийн хувьцааг бүрэн арилжих, худалдах;

2.1.5. Төрийн өмчит хуулийн этгээдийг өөрчлөн байгуулах, татан буулгах, бүтэц зохион байгуулалтыг өөрчлөх;

2.2. Зах зээл дэх төрийн оролцоог багасгах, хувийн хэвшил бие даан гүйцэтгэх боломжтой салбар дахь төрийн аж ахуйн үйл ажиллагааг зогсоож, зах зээлийн өрсөлдөөний зарчмаар хөгжих боломжийг хангах;

2.3. Төрийн эзэмшлийн хувьцааг худалдсаны орлого болон төрийн мэдлийн энгийн хувьцааг худалдаж орсон орлогын тодорхой хувийг улсын төсөвт төвлөрүүлэх;

2.4. Тухайн салбарт бүтээгдэхүүн, үйлчилгээний үнэ тарифыг зах зээлийн зарчмаар тогтоох боломжийг нэмэгдүүлэх;

2.5. Төрийн болон орон нутгийн өмчийн тухай хуульд заасан аливаа этгээд дангаар болон холбогдох этгээдийн хамт нээлттэй хувьцаат компани болсон төрийн болон орон нутгийн өмчит хуулийн этгээдийн нөлөө бүхий хувьцаа эзэмшигч байхыг хориглосон зохицуулалтыг бирж дээр хувьцааг нь арилжиж буй төрийн өмчит компанийн онцлогоос хамаарч өөр байхаар өөрчлөх чиглэлээр санал боловсруулж, шийдвэрлүүлэх.

ГУРАВ. ҮНДСЭН ЧИГЛЭЛИЙГ ХЭРЭГЖҮҮЛЭХ ЗОХИОН БАЙГУУЛАЛТ, АРГА, ХЭЛБЭР

3.1. Үндсэн чиглэлийг дараах зохион байгуулалттайгаар хэрэгжүүлнэ:

3.1.1. Улсын Их Хурлаас 2001-2022 онд баталсан төрийн өмчийг хувьчлах, өөрчлөн байгуулах болон төрийн өмчит хуулийн этгээдийн хувьцааг биржээр олон нийтэд нээлттэй худалдах үндсэн чиглэлүүдийн хэрэгжилтэд нийгэм, эдийн засаг, санхүүгийн өнөөгийн бодит нөхцөлд бодитой үнэлэлт, дүгнэлт хийж, төрийн нийтийн өмчид зайлшгүй байх, хувьчилж үл болох хөрөнгө болон ашгийн бус, нийгмийн шинжтэй төрөөс үйл ажиллагааг заавал хариуцан явуулах шаардлагатай төрийн өмчит хуулийн этгээдийн төрөл, чиглэлийг тодорхойлох, төрийн өмчийг хувьчлах, өөрчлөн байгуулах, төрийн өмчит хуулийн этгээдийн хувьцааг биржээр олон нийтэд нээлттэй худалдах талаар цаашид авах арга хэмжээний санал боловсруулах;

3.1.2. Үндсэн чиглэлд заасан төрийн өмчит хуулийн этгээдийг холбогдох хууль тогтоомжийн дагуу өөрчлөн зохион байгуулах;

3.1.3. Үндсэн чиглэлд заасан төрийн өмчит хуулийн этгээдийн энгийн болон нэмж гаргасан хувьцааг биржээр олон нийтэд нээлттэй арилжаалах ажлыг Засгийн газар зохион байгуулж, үр дүнг Улсын Их Хуралд тайлагнах;

3.1.4. Засгийн газар төрийн мэдлийн хувьцааг хөрөнгийн биржээр арилжихдаа хөрөнгийн зах зээлийн эрэлт, нийлүүлэлт, хөрөнгө оруулагчдын сонирхол, санал болгож буй хуулийн этгээдийн үнэ цэнэ зэрэг хүчин зүйлүүдийг бодитой харгалзан тухайн жилийн жагсаалтыг батлах;

3.1.5. Компанийн үнэлгээг тогтоох, энгийн хувьцааг нийтэд санал болгох үйл ажиллагааг хэрэгжүүлэхэд хөндлөнгийн, хараат бус хувийн хэвшлийн компанийг нээлттэй сонгон шалгаруулах;

3.1.6. Үндсэн чиглэлд заасан төрийн өмчит хуулийн этгээдийг нээлттэй хувьцаат компани болгох, энгийн хувьцааг нийтэд санал болгох ажиллагааг ил тод, нээлттэй зохион байгуулах ажлыг төрийн өмчийн асуудал хариуцсан төрийн захиргааны байгууллага тухайн компанийн хувьцаа эзэмшигчийн эрхийг хэрэгжүүлэгчтэй хамтран хэрэгжүүлэх;

3.1.7. Олон нийтэд нээлттэй хувьцаат компани хэлбэрт шилжүүлэх хуулийн этгээдийн зах зээлийн үнэлгээ, ирээдүйн үнэ цэнийг нарийвчлан тогтоосны үндсэн дээр хэрэгжүүлэх;

3.1.8. Нэмж хувьцаа гарган биржээр олон нийтэд нээлттэй худалдах замаар татан төвлөрүүлсэн хөрөнгөөр компанийн өөрийн хөрөнгийг нэмэгдүүлж, орлого олох үндсэн үйл ажиллагаа, үр ашгийг сайжруулах төсөл арга хэмжээнд зарцуулах.

3.2. Үндсэн чиглэлийн 3.1.7-д заасан үнэлгээний зардлыг тухайн хуулийн этгээд санхүүжүүлнэ.

ДӨРӨВ. БИРЖЭЭР НЭЭЛТТЭЙ ХУДАЛДАХ ТӨРИЙН ӨМЧИТ ХУУЛИЙН ЭТГЭЭДҮҮД

4.1. Дараах төрийн өмчит хуулийн этгээдүүдийн энгийн хувьцааг нэмж гарган биржээр олон нийтэд нээлттэй худалдана:

4.1.1. "Монголын цахилгаан холбоо" ХК-ийн энгийн хувьцааны 49 хүртэлх хувийн хувьцааг нэмж гарган биржээр олон нийтэд нээлттэй арилжих бөгөөд төрийн эзэмшил 51 хувиас багагүй байх;

4.1.2. "Хөдөө аж ахуйн бирж" ХХК-ийг хувьцаат компанийн хэлбэрт шилжүүлсний дараа энгийн хувьцааны 66 хүртэлх хувийн хувьцааг нэмж гарган биржээр олон нийтэд нээлттэй арилжих бөгөөд төрийн эзэмшил 34 хувиас багагүй байх;

4.1.3. "Үндэсний давхар даатгал" ХК-ийн энгийн хувьцааны 34 хүртэлх хувийн хувьцааг нэмж гарган биржээр олон нийтэд нээлттэй арилжих, хувьцааг арилжаалахдаа ижил төрлийн үйл ажиллагаа эрхэлж буй олон улсын хөрөнгө оруулагчдад тэргүүн ээлжид санал болгон хуваарилах зарчим баримлах, төрийн эзэмшил 66 хувиас багагүй байх;

4.1.4. “Монголын хөрөнгийн бирж” ХК-ийн төрийн эзэмшлийн хувьцааны 15 хүртэлх хувийг нэмж гарган биржээр нээлттэй арилжаалах бөгөөд төрийн эзэмшлийн хувийг 51 хувиас багагүй байх. Хувьцааг арилжаалахдаа олон улсын хөрөнгө оруулагчдад тэргүүн ээлжид санал болгон хуваарилах зарчмыг баримтална;

4.1.5. “Хөдөө аж ахуйн корпорац” ХХК-ийг хувьцаат компанийн хэлбэрт шилжүүлсний дараа энгийн хувьцааны 49 хүртэлх хувийн хувьцааг нэмж гарган биржээр олон нийтэд нээлттэй арилжих бөгөөд төрийн эзэмшил 51 хувиас багагүй байх;

4.1.6. “Шивээ овоо” ХК-ийн энгийн хувьцаа 49 хүртэлх хувийг нэмэлт хувьцаа гарган биржээр нээлттэй худалдах арга хэмжээг хэрэгжүүлэх бөгөөд төрийн эзэмшил 51 хувиас багагүй байх;

4.1.7. “Багануур” ХК-ийн энгийн хувьцаа 24 хүртэлх хувийг нэмэлт хувьцаа гарган биржээр нээлттэй худалдах арга хэмжээг хэрэгжүүлэх бөгөөд төрийн эзэмшил 51 хувиас багагүй байх;

4.2. “МИАТ” ХК-ийн энгийн хувьцааны тодорхой хэсгийг стратегийн болон санхүүгийн хөрөнгө оруулагч нарт санал болгох, энгийн хувьцаа нэмж гарган олон улсын биржээр нээлттэй худалдах арга хэмжээг үе шаттайгаар хэрэгжүүлнэ;

4.2.1. “МИАТ” ХК-ийн энгийн хувьцааны 10 хүртэлх хувийн хувьцааг стратегийн хөрөнгө оруулагч нарт санал болгох замаар нээлттэй компани болгох;

4.2.2. “МИАТ” ХК-ийн төрийн мэдлийн энгийн хувьцааг худалдаж орсон орлогыг улсын төсөвт төвлөрүүлэх;

4.2.3. Хөрөнгө оруулагчийн менежментийн оролцоотойгоор компанийн үнэ цэнийг өсгөсний үндсэн дээр 34 хүртэлх хувийн нэмэлт хувьцаа олон улсын биржээр нээлттэй худалдах бөгөөд төрийн эзэмшил 51 хувиас багагүй байх;

4.3. “Төрийн банк” ХК-ийн төрийн эзэмшлийн энгийн хувьцааг 51 хувиас багагүй хэмжээнд үлдээж, Хадгаламжийн даатгалын корпорацын эзэмшлийн 45.03 хүртэлх хувийг биржээр нээлттэй худалдана:

4.3.1. Улсын Их Хурлаас баталсан үндсэн чиглэлийн хүрээнд Монгол банктай хамтран хөтөлбөр батлан хэрэгжүүлэх;

4.3.2. “Төрийн банк” ХК-ийн төрийн эзэмшлийн энгийн хувьцааг 51 хувиас багагүй байхаар тооцон, “Хадгаламжийн даатгалын корпорац”-ийн эзэмшлийн 45.03 хувийг биржээр нээлттэй худалдах. Ингэхдээ олон улсын мэргэжлийн хөрөнгө оруулагчдад санал болгох.

4.4. Стратегийн ач холбогдол бүхий ашигт малтмалын ордын ашиглалтын тусгай зөвшөөрөл эзэмшиж байгаа төрийн өмчит хуулийн этгээдийн хувьцааг Ашигт малтмалын тухай хуульд заасны дагуу биржээр олон нийтэд нээлттэй худалдана:

4.4.1. “Эрдэнэс Тавантолгой” хувьцаат компанийг Монголын хөрөнгийн биржид бүртгэлтэй нээлттэй хувьцаат компани болгох, Монгол Улсын иргэдэд хувьцаа эзэмшигчийн эрхийг бүрэн олгох, төрийн эзэмшлийн хувьцааны 10-аас доошгүй хувийг биржээр олон нийтэд нээлттэй арилжих;

4.4.2. Улсын Их Хурлын 2017 оны 23 дугаар тогтоолын 3-т заасны дагуу “Эрдэнэт үйлдвэр” ХХК-ийн 49 хувийн энгийн хувьцааг Хөгжлийн банк болон Монгол

банкнаас Худалдаа хөгжлийн банканд байршуулсан мөнгөн хөрөнгө, ногдол ашиг, вексель зэрэг эх үүсвэрээс суутган тооцох асуудлыг шийдвэрлэж, “Эрдэнэт үйлдвэр” төрийн өмчит үйлдвэрийн газрыг компанийн хэлбэрт шилжүүлсний дараа энгийн хувьцааны 10-аас доошгүй хувийг биржээр олон нийтэд нээлттэй арилжих;

4.4.3. Улсын Их Хурлын 2017 оны 23 дугаар тогтоолын 3-т заасны дагуу Монголросцветмет ХХК-ийн 49 хувийн энгийн хувьцааг Хөгжлийн банк болон Монгол банкнаас Худалдаа хөгжлийн банканд байршуулсан мөнгөн хөрөнгө, ногдол ашиг, вексель зэрэг эх үүсвэрээс суутган тооцох асуудлыг шийдвэрлэж, “Эрдэнэс критикал минералс” төрийн өмчит үйлдвэрийн газрыг компанийн хэлбэрт шилжүүлсний дараа энгийн хувьцааны 10-аас доошгүй хувийг биржээр олон нийтэд нээлттэй арилжих;

4.5. Эрчим хүч үйлдвэрлэх болон түгээх тусгай зөвшөөрөл эзэмшигч дараах төрийн өмчит компаниудын энгийн хувьцааны 49 хүртэлх хувийн хувьцааг биржээр олон нийтэд нээлттэй худалдах болон өөрчлөн зохион байгуулна;

4.5.1. “Дулааны III цахилгаан станц” ТӨХК-ийн энгийн хувьцааны 49 хүртэлх хувийн хувьцааг биржээр олон нийтэд нээлттэй арилжаалан нээлттэй хувьцаат компани болгох бөгөөд төрийн эзэмшил 51 хувиас багагүй байх;

4.5.2. “Дулааны IV цахилгаан станц” ТӨХК-ийн энгийн хувьцааны 49 хүртэлх хувийн хувьцааг биржээр олон нийтэд нээлттэй арилжаалан нээлттэй хувьцаат компани болгох бөгөөд төрийн эзэмшил 51 хувиас багагүй байх;

4.5.3. “Эрдэнэтийн дулааны цахилгаан станц” ТӨХК-ийн энгийн хувьцааны 49 хүртэлх хувийн хувьцааг биржээр олон нийтэд нээлттэй арилжаалан нээлттэй хувьцаат компани болгох бөгөөд төрийн эзэмшил 51 хувиас багагүй байх;

4.5.4. “Дорнод бүсийн эрчим хүчний систем” ТӨХК-ийн цахилгаан дамжуулах сүлжээг “Цахилгаан дамжуулах үндэсний сүлжээ” төрийн өмчит хувьцаат компанид нэгтгэн зохион байгуулсны үндсэн дээр энгийн хувьцааны 49 хүртэлх хувийн хувьцааг биржээр олон нийтэд нээлттэй арилжаалан нээлттэй хувьцаат компани болгох бөгөөд төрийн эзэмшил 51 хувиас багагүй байх;

4.5.5. “Дарханы дулааны цахилгаан станц” ТӨХК-ийн энгийн хувьцааны 49 хүртэлх хувийн хувьцааг биржээр олон нийтэд нээлттэй арилжаалан нээлттэй хувьцаат компани болгох бөгөөд төрийн эзэмшил 51 хувиас багагүй байх;

4.5.6. “Амгалан дулааны станц” ТӨХК-ийн энгийн хувьцааны 49 хүртэлх хувийн хувьцааг биржээр олон нийтэд нээлттэй арилжаалан нээлттэй хувьцаат компани болгох бөгөөд төрийн эзэмшил 51 хувиас багагүй байх;

4.6. Төрийн өмчит болон төрийн өмчийн оролцоотой компанийн төрийн эзэмшлийн хувьцааг худалдах, арилжих хуулийн этгээдүүд

4.6.1. “Дулаан шарын гол” төрийн өмчит хувьцаат компанийн төрийн эзэмшлийн хувьцааг худалдах;

4.6.2. “Цемент шохой” төрийн өмчит хязгаарлагдмал хариуцлагатай компанийн төрийн эзэмшлийн хувьцааг худалдах;

4.6.3. “Монгол шуудан” хувьцаат компанийн төрийн эзэмшлийн хувьцааг Монголын хөрөнгийн биржээр арилжих.

4.6.4. "Багануур дулааны станц" төрийн өмчит хувьцаат компанийн төрийн эзэмшлийн хувьцааг худалдах;

4.6.5. "Налайхын дулаан станц" төрийн өмчит хувьцаат компанийн төрийн эзэмшлийн хувьцааг худалдах;

4.6.6. "Хөвсгөл дулааны станц" төрийн өмчит хувьцаат компанийн төрийн эзэмшлийн хувьцааг худалдах;

4.6.7. "Ховд дулааны станц" төрийн өмчит хувьцаат компанийн төрийн эзэмшлийн хувьцааг худалдах;

4.6.8. "Улаангомын дулааны II станц" төрийн өмчит хувьцаат компанийн төрийн эзэмшлийн хувьцааг худалдах;

ТАВ. ТӨРИЙН ӨМЧИТ ХУУЛИЙН ЭТГЭЭДИЙГ ӨӨРЧЛӨН БАЙГУУЛАХ, ТАТАН БУУЛГАХ, БҮТЭЦ ЗОХИОН БАЙГУУЛАЛТЫГ ӨӨРЧЛӨХ.

5.1. "Эрдэнэс Монгол" хязгаарлагдмал хариуцлагатай компанийг олон улсын менежментийн багаар удирдуулах, үр ашиг, баялгийн тэгш хуваарилалтыг нэмэгдүүлэх;

5.2. Эрчим хүчний салбарын өсөлт, либералчлах, эрчим хүчний салбарыг чөлөөт зах зээлийн зарчимд шилжүүлж, үнэ тарифыг зохистой түвшинд хүргэн, цаашид тогтмол индексжүүлэх тогтолцоог нэвтрүүлж, салбарын эрх зүйн орчныг шинэчлэх;

5.2.1. "нэг худалдан авагчийн загвар"-ыг өрсөлдөөнт зах зээлийн загварт шилжүүлэх;

5.2.2. "Дорнод бүсийн эрчим хүчний систем" төрийн өмчит хувьцаат компанийн цахилгаан дамжуулах сүлжээ болон "Диспетчерийн үндэсний төв" төрийн өмчит хязгаарлагдмал хариуцлагатай компанийн системийн операторын үүргийг "Цахилгаан дамжуулах үндэсний сүлжээ" төрийн өмчит хувьцаат компанид нэгтгэн зохион байгуулах;

5.2.3. "Улаанбаатар цахилгаан түгээх сүлжээ" ТӨХК-ийн цахилгаан эрчим хүчээр хангах тусгай зөвшөөрөл эзэмшигчийг түгээх тусгай зөвшөөрөл эзэмшигчээс салгаж бие даасан хуулийн этгээд болгох;

5.3. Мэдээлэл технологийн үйлдвэрлэлийг дэмжих тухай хуулийн хэрэгжилтийг хангах хүрээнд "Мэдээлэл технологийн үндэсний парк" төрийн өмчит үйлдвэрийн газрыг мэдээллийн технологийн салбарын "Судалгаа, бизнес хөгжүүлэлтийн төв" болгон өөрчлөн зохион байгуулж, холбогдох яамны харьяалалд шилжүүлэх;

5.4. "Авто импекс" хувьцаат компанийг Шүүхийн шийдвэр гүйцэтгэх тухай хуулийн хүрээнд татан буулгаж, Шүүхийн шийдвэр гүйцэтгэх ерөнхий газрын шийдвэрээр битүүмжилж, хураагдсан хөрөнгийг "Автотээврийн үндэсний төв" төрийн өмчит үйлдвэрийн газрын мэдэлд шилжүүлэн холбогдох өр төлбөрийг нь барагдуулах;

5.5. "Төвийн бүсийн хүнс, хөнгөн үйлдвэрлэл технологийн цогцолбор" ХХК-ийг "Хөдөө аж ахуйн корпораци" ХХК-д нэгтгэн зохион байгуулах;

5.6. Авто замын засвар, арчлалтын үйл ажиллагаа эрхэлж буй "Автозам засвар арчлалтын нэгтгэл" төрийн өмчит хувьцаат компанийн бүтэц зохион байгуулалтыг өөрчлөх. Үүнд:

а/Авто замын засвар, арчлалтын үйл ажиллагаа эрхэлж буй “Автозам засвар арчлалтын нэгтгэл” төрийн өмчит хувьцаат компанийг татан буулгаж, “Зам, тээврийн хөгжлийн төв” төрийн өмчит үйлдвэрийн газарт нэгтгэн өөрчлөн зохион байгуулах.

--o0o—